

樂縣志卷五

志人物

勲業

唐

張公謹字弘慎魏州繁水人爲王世充洧州長史與
刺史崔樞挈城歸唐授檢校鄒州別駕未知名李
勣尉遲敬德數啟秦王乃引入府王將討隱巢亂
使卜人占之公謹自外至投龜於地曰凡卜以定
猶預決嫌疑今事在不疑何卜之爲卜而不吉其
可已乎隱太子死其徒攻元武門銳甚公謹獨閉

關拒之以功授左武衛將軍封定遠郡公後副李靖經略突厥條可取狀帝然所謀及破定襄擒頡利璽書慰勞封鄒國公後改定襄都督以惠政聞卒帝將出次哭之有司奏日在辰不可帝曰君臣猶父子也情感於內安有所避遂哭之贈左驍衛

大將軍諡曰襄後追改鄒國公舊志別載公謹孫一行自幼聰悟從

高僧盧鴻文游窮大衍歷數得其精妙初漢洛下閎造大衍歷云歷八百年當差一日有聖人出而定之一行當其期正其差謬名曰開元大衍歷經七章一卷長執歷一卷古今歷書二十四卷略例奏章一卷卒諡大慧

張文瓘字稚圭本武城人隋大業末徙家昌樂幼孤

事母兄以孝友聞貞觀時第明經補并州參軍時
李勣爲長史嘗嘆曰稚圭今之管樂也吾所不及
勣入朝文瓘與屬僚二人出餞勣贈二人以佩刀
玉帶而不及文瓘文瓘疑請勣曰子無爲嫌若某
猶預少決故贈以刀欲其果於斷某放誕少檢故
贈以帶俾守約束若子才無施不可焉用贈因極
推引遷水部員外郎時兄文琮爲戶部侍郎制兄
弟不並臺閣出爲雲陽令累授參知政事乾封二
年與李勣並相俄知左史事時高宗營蓬萊上陽
合璧等宮復征討四彝京師養廐馬萬匹帑廩寢

虛文瓘諫曰王者養民逸則富以康勞則怨以叛
秦漢隋事四彝宮室至二世土崩武帝末年戶口
減半隋鑒未遠不可不察帝善其言賜繒錦百段
爲減廐馬數千改黃門侍郎兼大理卿不旬日斷
疑獄四百抵罪者無怨言嘗有小疾囚相與齋禱
願亟視事時以執法平恕方諸戴胄後拜侍中諸
囚聞其遷皆垂泣其得人心如此性嚴正未嘗回
容諸司奏議悉加糾駁故帝委之或時移疾他宰
相奏事帝必問與文瓘議未若不者曰往共籌之
或曰已議卽皆報可新羅叛帝將出兵討之文瓘

請息兵以懷異俗詔可卒諡曰懿子四潛沛治涉

皆至三品時謂萬石君家崇祀鄉賢

舊志

張文琮文瓘兄好自寫書筆不釋手永徽中獻頌文
皇帝優制褒美拜戶部侍郎出爲建州刺史禁淫
祠立社稷民悅從之子錫久視初代其甥李嶠爲
宰相請還廬陵王不爲張易之所右下司刑三品
院神氣不懾旣而流循州神龍中起工部尙書同
中書門下三品旬日出爲絳州累封平原郡公

據府志

志補 舊志但載文瓘而不及文琮疑自武城來
居者僅文瓘一人矣府志則并文琮與從弟文收
咸載之當別有據

從之文收見文苑

李義琰昌樂人博學有智識以進士補太原尉時都督李勣言貌威重義琰獨敢廷辨曲直勣甚禮之上元中進同中書門下三品高宗欲使武后攝國政義琰與郝處俊固爭事得寢帝每顧問對必鯁切其居第甚隘弟義璣嘗爲市材送之義琰曰事難全遂物不兩興旣處貴仕又廣居宇非有令德必受其殃卒不許後乞骸骨公卿以下祖餞通化門外時人以比漢疏廣垂拱初起爲懷州刺史不出而卒子巢幼豪俊善騎射不治細行義琰禁之絕其交遊後亡走闕下獻書陳利害拜監察御史

遷殿中上書忤旨貶龍編主簿

據府志補錄舊志

李義琛義琰弟擢進士歷御史貞觀中文成公主貢金遇盜於岐州主名不立太宗召羣御史至目義琛曰是人神爽拔可以追捕義琛往數日獲賊帝喜加七階累遷刑部侍郎雍州長史時關輔大饑詔貧民就食商鄧義琛恐流徙不還上疏固爭左遷黎州都督終岐州刺史崇祀鄉賢

據府志補錄舊志

五代漢

王章仕至太尉同平章事時漢方新造承契丹亂後而關西三叛繼作國家空虛章供頓未嘗乏絕隱

帝忌而殺之

據府志補

金

李國棟字厦卿明昌中登第爲汝上令拜監察御史

彈劾不避權貴仕至陳州防禦使領大名府兵馬

都總管崇祀鄉賢

舊志

元

王珍字國寶慷慨有大志金末同縣人楊鐵槍聚衆

保鄉里降太祖鐵槍與金戰死之衆推蘇椿代領

其衆宋將彭義彬來侵椿降珍棄妻子依按只及

椿歸順乃授珍輔國上將軍兼大名路安撫使僉

行省事椿有異志珍收之椿乃遁庚子入見言大
名困於賦年稱貸西域賈人銀八十錠通糧五萬
斛苟復徵之民不聊生亂且滋矣詔悉蠲免後戊
睢州修城隍明斥堠宋兵不敢逼進本路萬戶加
賜金虎符崇祀鄉賢

據府志改
錄舊志

王文幹珍子善騎射襲行軍萬戶從攻鄂州中流矢
賜良馬金帛從討李壇平之功最賜白金二千器
皿百雜綵數百文幹悉願諸軍中官至江東提刑

弟文禮官千戶

據府志改
錄舊志

按以上諸公彪炳史策昭若日星如張鄴公之

卓識偉略固不世出者而張黃門李中書以儒術勵官常尤吾人所宜佩服其他遭遇不同故建樹亦異要皆不可以尋常視也

明

楊泰以奉天靖難居守有功官至刑部侍郎卒贈戶

部尚書官其子鏞爲禮部郎中崇祀鄉賢

舊志

董俊舉人受知英廟不俟廷奏擢監察御史中外奇之未幾勅按淮南關陝山東應天等處俱激揚有聲進秩雲南副使會尋甸夷類攘殺俊兵不血刃而首惡就擒境內晏然後廣西臨安及鐵索等赤

石崖等處弗靖俊皆籌畫安定之又孟密會婦孺罕弄不服本邦管束俊亦撫慰底定又置沅江土守爲交南未然慮築南海長隄滇人賴其利至今無窮焉陞雲南按察使崇祀鄉賢子懷蓬萊丞更名慶雲有文行慤桐城巡檢孫豸裔丙午舉人

舊志

魏允貞字懋忠號見泉萬厯丁丑進士初授荊州府

推官荆俗剽勁善訟多疑獄至則取而廷鞠數語剖決一無遁情荊州爲時相張居正梓里官其地者視爲畏壘允貞廉貞自矢張氏奴有不逞者繩之以法治行稱最徵授御史奏議多忤執政黜爲

許州判官旋改南都吏部主事見知於海忠介又
上疏白趙南星之枉居二年疏請致仕吳江相寢
之而徙爲光祿丞數月有諭祭秦藩之命允貞爲
正使餽遺一無所取尋以父年老告歸三年卽家
拜順天府丞陞右通政以廷推巡撫山右至則條
上五事謂選舉得宜則吏治修支放足數則軍情
悅屯鹽足數則國計實宗室不犯則國體尊禁林
不伐則邊防固皆得報可歲省冗費數萬建烽障
市驪馬修倉廩築邊牆督造鎧甲戎器復以其餘
助大工征討修書院課士皆取諸所節省者一時

山西吏治幾於兩漢閭閻安樂歌誦徧野邊外部

不敢飲馬於河會張位等以開礦之說進上疏極

諫又陳君臣交警之謨

二疏載在藝文

疏入皆不報自抽

稅之使四出山西內監張忠等橫肆無忌文武吏士人逆其志者逮繫纍纍於路而有司候選臺省久留不下又上疏言陛下不宜重閹寺而輕言官疏入不報稅監遂舉劾有司典史驛丞等官往往斃於陵虐乃上疏自劾不能爲吏民延旦夕之命臣罪宜罷黜又不報遂挺身扞之力摧其爪距其輩氣讐見允貞不能出一語遂奏允貞沮格礦稅

且誣以八年公費酒稅等銀數十萬皆入已上下
奏令部院諸大臣議於是九卿合詞上言撫臣允
貞清苦之節天下莫不聞彼參內臣內臣亦參之
詆譖相報天下共知其枉疏上不報而南北臺省
之疏俱至山西吏民數千人叩閭籲留事遂寢稅
使之疏旣上允貞所興建諸領其役者統支給之
數一一劄記出以相質錙銖不爽不惟公款未嘗
私用並多捐廉爲之者衆益驚服撫晉九年不攜
妻子杜絕賄囑裁抑豪強明山右巡撫推允貞爲
首卒贈都察院右都御史謚介肅賜葬祭建特祠

並祀鄉賢所著有詩稿疏草數十卷青州馮宗伯
謂其清忠不愛爵祿於古人似汲黯於今人似海
忠介嚴司寇陳太宰云

梁天奇字完易號震寰忠誠孝友寒苦力學後登第
授行人七載考選御史條陳罷斥羣小恪遵舊典
皆蒙嘉納巡視茶馬捐贖鍰以佐軍需搜積茶以
抵舊餉案東粵兼攝撫篆勦平流寇建州置縣以
功升棘卿奉命熱審多所平反勞瘁致疾告歸殞
於道事聞加贈賜祭崇祀鄉賢

刪錄
舊志

[按]有明以來樂邑人材時盛時衰而位與時值

功業斯彰如四人者或正議於朝或勤施於國
莫不以剛大之氣抒忠愛之忱後之學者知吾
邑有此偉人益足以奮發其志氣然功業者本
之學術而基諸德行者也學術不純德行不立
則建樹亦乖何功業之足述故慕其功業必先
端其學術尤必先勵其德行

宦業

唐

李管義琛子爲栢人令有仁政縣爲立祠祭之

元

明 子奇官至真定路廉訪使以清介稱崇祀鄉賢

王斌由監生官至廣東布政司參政精敏才幹有能聲

孟景和貢生永樂七年授山東日照縣知縣在官九年多異政行取在部以疾故辭職歸

陳暹子奇曾孫由儒士任商水知縣恪守家法有惠政清名焉

按以上五人垂名簡策當日宜有偉績而時代易遷傳聞失考僅志名稱如此考古者當知書